

# OFFÌCIU DE SU ROSÀRIU CUN S'ADORAZIONI E BENEDITZIONI EUCARÌSTICA

“Preguntas e torradas”

Bozza / Guida  
per contributi e osservazioni  
a partire dal Terzo Convegno di Senis  
30 ottobre 2005

Il presente sussidio viene consegnato durante il Convegno in forma provvisoria, come materia e occasione di osservazioni e contributi, di contenuto e di lingua,

da parte dei partecipanti, amanti della “tradizione” sarda o facenti parte di gruppi parrocchiali o “cunfrarias”,

in vista di una stesura finale da includere nella pubblicazione degli Atti, ma soprattutto da condividere a livello di vita ecclesiale vissuta, tra gruppi parrocchiali o di “cunfraris”.

Tra le osservazioni si possono includere anche segnalazioni o produzioni nuove di espressione in sardo di alcuni testi che nel sussidio sono stati mantenuti in latino, secondo la tradizione sarda.

Oltre alle osservazioni eventualmente proposte e raccolte durante il Convegno stesso, si prega di far pervenire al Parroco di Senis le osservazioni che si riterranno opportune entro la fine di Dicembre.

*Il Comitato Scientifico del Convegno*  
R. Caria - G. Mele - A. Pinna

## MODU DE ARRESAI SU ROSÀRIU CUN S'ADORATZIONI E BENEDITZIONI EUCARÌSTICA

In nòmini de su Babbu, de su Fillu e de su Spìritu Santu. Amen Gésus.

Oberei, o Sennori, is lavrasostas po benedixiri su Santu Nòmini bostu, e cuddu ancoras de sa Santìssima Mama bosta Maria. Illuminai sa mènti nosta, movei sa voluntadi nosta e inflammai su coru nostu de su divinu amori bostu, po chi attentamenti e divotamenti arreseus custu santu Rosàriu, e potzaus èssiri esaudius ananti de sa divina Magestadi bosta, chi cun su Babbu e su Spìritu Santu bivéis e rennais po totu is sèculus de is sèculus. Amen Gésus.

**Primu granu. Attu de fidi:** Sennori miu Gesu Cristu, dèu crèu firmamenti chi bos seis deaderu presenti in su Santìssimu Sacramentu, e segundu su chi eis nau a is iscientis bostus, chistionendiddis de su perdonu: *Innuì duus o tres funt pinnigaus torra impari, in nòmini miu, inni ddui sèu dèu, impari cun issus.*

**Su de duus granus. Attu de speràntzia.** Sennori, dèu spèru chi donendisì totu a mèi in custu divinu Sacramentu, mèis a usai misericórdia, segundu su chi eis nau a is iscientis bostus: *Chi duus de bosatrus in terra s'èis a pònniri de acòrdiu in cussas cosas innui iais pigau chistioni, Babbu miu in is celus dd'as at a sighiri po bosatrus.*

**Su de tres granus. Attu de caridadi.** Sennori, bosu seis su Salvadori miu infinitamenti amàbili; e po cussu bos amu cun totu su còru prus de totus is cosas, e po amori bostu amu ancora is pròssimus mius comentì a mei e totu, e perdònu de còru a chini m'at offèndiu, segundu su chi eis nau a is iscientis bostus de *perdonai dònna di fintzas a setanta bortas seti.*

**Su de quartu granus. Attu de contritzioni.** Sennori, dèu detèstu totu is peccaus mius chi mi faint indinnu de bos arriciri in su còru miu, propongu cun sa gràtzia bosta de mai prus pecai e de ndi fuiri is occasionis, segundu su chi eis nau a su màrturu: *Càstia, ses sanau; no pechist prus.*

**Su de cincù granus. Attu de umilidadi.** Sennori, dèu no sèu dinnu chi bos bengeas in su coru miu, *ma narai feti una paràula, e s'ànima mia at a èssiri salvada.*

Gloria Patri et Filio et Spiritui sancto. Sicut erat in principio et nunc et semper, et in saecula saeuclorum. Amen.

[A Deus Babbu Creatori, / A su Fillu Redentori, / E a s' Amori sustanziali  
Infinita gloria uguali / Immoi siat e in dònna edadi, / E in totu s' eternidadi]

Laudadu semper siat / su nòmini de Gésus, de Giusèpi e de Maria.  
Laudeus prus e prus / su nòmini de Maria, de Giusèpi e de Gésus.  
Siat semper laudau / Su Rèi nostu Gésus Sacramentau.

Babbu nostu, chi ses in is celus, santificau siat su nòmini tuu, bengat a nòsu su rénniu tuu, siat fatta sa voluntadi tua comentì in su celu aici in sa terra.  
Su pani nostu de dònna di donanosidd'oi, e perdonanosì is pecaus nostus, comentì nosàterus perdonaus a is depidoris nostus, e no nos lessis arrui in sa tentatzioni, ma liberanosì de totu mali. Amin Gésus.

Ave Maria, plena de gràtzia, su Sennori est cun tegus, beneditta ses tui intrè tot'is feminas, e benedittu est su frutu 'e is intrànnias tuas, Gésus.  
Santa Maria, mama de Deus, pregài po nosàterus peccadoris, imói e in s'ora de sa morti nosta. Amin Gésus.

*Pustis de dònna posta si ripitit:* Glória Patri... Laudau semper siat...

*Agabau su Rosàriu, si narat o si cantat su **Salve, Regina** e, in su mesi de otobri, s'Oratzioni a Santu Giusèpi.*

### Oratzioni a Santu Giusèpi.

O gloriosu Santu Giusèpi, nosàterus opprimus de affannus e tribulatzionis, nos protraus a is peis tuus, e in cunfidàntzia invocaus sa protetzioni tua a pustis de nos'èssiri incumandaus a sa Santìssima Sposa tua Maria.

Po cudda grandu caridadi chi t'iat uniu a sa Virgini Immaculada, Mamma de Deus, e po s'amori mannu chi coment'è Babbu iast portau a su Bambinu Gésus, ti suplicamus de nos cuntemplai piedosu, poita siaus redimius cun su pretziosu Sànguni de Gésus; e cun su poderi e grandesa tua cunfortanosì in is tribulatzionis nostas.

O amabili Protettori de sa Sagrada Familia, ampara sa Familia Cristiana. Atesianci de nosàterus, o Babbu amantìssimu, tantis erroris chi corrupint su mundu. De su tronu de glória a su cali ses stètiu sublimau, assistinosì propítziu, o fortunatìssimu Protettori. E comentì in d'unu tempus iast liberau de morti su Bambinu Gésus, libera immoi sa Crésia santa de dònna insidia e aversidadi: siaus nosàterus costantementi rinforzaus de s'esemplu e de sa protetzioni tua, po chi potzaus virtuosamenti biviri, e a pustis de una santa morti potzaus gosai de s'eterna beatitùdini. Amen Gésus.

*Pustis si cantant is Litanias, a pag.*

• *Candu si fait s'ADORATZIONI E SA BENEDITZIONI EUCARISTICA CUN SA BENEDITZIONI, si cantat comentì a pag.*

• *Si non si fait s'Adoratzioni, si finit narendi:*

V. Nos cum prole pia

R. Benedicat Virgo Maria. Divinum auxilium maneat semper nobiscum. Amen.

**PRIMU MISTÉRIU IN GÓSU**  
**S'Annunziatzioni de s'Angelu a Maria Santissima**

**In custu primu mistériu in gósu eus a considerai:**

- 1) Comenti s'eterna e divina Sabiduria iat pigau unu modu tantu cumbenienti po sa saludi de su géneru umanu, chi su Fillu de Deus essit beniu a si fai ómini po s'ómini.
- 2) Comenti s'Arcàngelu Gabrieli iat annunziadu po parti de Deus a sa Virgini Maria, chi issa depiat nàsciri su Salvadori de su mundu, e s'umilidadi tantu profunda cun sa cali custa Signora rispondesit: *Eccu sa serbidora de su Sennori. Deus fatzat cun mei segundu sa paràula tua.*
- 3) Comenti tantu straordinàriu fut su gósu chi iat provau sa Virgini santissima in si biri in is intrànnias suas virginalis incarnau e fatt'ómini su Fillu de Deus.

**E cuntemplendi custu mistériu eus a narri...** ( 1 Babbu nostru e 10 Ave M.)

**Offresimentu.** O Virgini Santissima e benaventurada, nosta Sennora de su Rosàriu: nosàterus os ofereus umilmenti custas dèxi Ave Marias e unu Babbu nostu, a su gósu chi eis tentu, candu de s'Arcàngelu Gabrieli festis stada sa laudada cun cuddas dulcis paràulas: Deus ti salvit, Maria, plena de gràtzias; e os annunziesit comenti su Fillu de Deus beniat a si fai ómini in is virginali intrannias bostas po sa saludi de su géneru umanu, e bosu cun profunda umilidadi eis rispostu: *Eccu sa Serbidora de su Sennori, si fatzat in mei segundu sa paràula tua.*

Contra sa malignidade  
de su comunu adversàriu,  
O Reina de su Rosàriu,  
sos divotos amparade!

Pro cuddu gósu chi apegis  
cun s' angelic' imbasciada  
cando in totu seberada  
pro Mama de Deus istegis  
cun su cunsensu chi degis  
a sa eterna boluntade!

O Reina de su Rosàriu,  
sos divotos amparade!

**Oratzioni.** Bos suplicamus, o Virgini benedicta, nos alcantzeis de su Fillu bostu tanti istimau perfetta umilidadi, cun sa cali nos dispongaus a fai totu is cosas segundu sa voluntadi sua. Amen Gésus.

**In su de duus mistériu in gósu eus a considerai:**

- 1) Comenti s'Arcàngelu Gabrieli iat nau a sa Virgini Santissima chi sa parenti sua Sant'Elisabetta iat ingendrau unu fillu in sa betzesa sua, e issa cun prestesa fiat partia a dda visitai.
- 2) Sa meraviglia cun sa cali Sant'Elisabetta dd'iat arricida e su gósu chi su pipiu Santu Giuanni, essendu ancoras in is intrànnias de sa mama, nd'iat provau.
- 3) Comenti Sant'Elisabetta, plena de su Spiritu Santu, iat pronunziadu cuddas dulzis paràulas: *Benedicta ses tui intrè totus is féminas e benedittu est su fruttu de is intrànnias tuas.*

**E cuntemplendi custu mistériu eus a narri...** ( 1 Babbu nostru e 10 Ave M.)

**Offresimentu.** O clementissima Virgini Maria, Abogada nosta: nosàterus os offereus umilmenti custas dèxi Ave Marias e unu Babbu nostu, a su gósu chi s'ànima bosta at provau candu cun intzendida caridadi festis andada cun tanta prestesa a visitai sa parenti bosta Sant'Elisabetta e festis istada in cumpangia sua gasi tres mesis; cun sa cali visita su pipiu Santu Giuanni, ancoras in is intrànnias de sa mama sua, fiat stau santificau, e bosu, Signora, fiais stada de issa saludada e connota po Mama de Deus.

Pro s' amorosa visita  
cando sant' Elisabetta  
de su spiritu repleta  
bos jamesit benedicta  
connoschende s' infinita  
Incarnada Magestade !  
O Reina de su Rosàriu,  
sos divotos amparade!

**Oratzioni.** Bos suplicamus, Mama nosta misericordiosissima, nos alcantzeis de su Fillu bostu pretziosissimu una fervorosa caridadi cun is pròssimus nostus, e chi is ànimas nostas merexant reciri de Deus sa santificatzioni e conoscimentu de is divinus mistériu. Amen Gésus.

**SU DE TRES MISTÉRIUS IN GÓSU**  
**Sa nàscida de Gesu Cristu in sa grutta de Betlem**

**In su de tres mistérius in gósu eus a considerai:**

- 1) Comenti, cumplidus is nòi mèsis de s'Incarnatzioni de su Fillu de Deus, istendu sa Virgini Santissima in su portali de Betlem, nascetit de Issa su Fillu suu santissimu, e ddu fascetit in pòburus pannus e ddu pongesit aintru de s'istadda in d-una mandiadroxa de animalis, po non ténniri mellus logu de ddu collocai.
- 2) Si dèpit considerai su càntidu festosu de is Àngelus, sa devotzioni de is pastoris e s'òbbe-diéntzia de is animalis a su Creatori insoru.
- 3) Consideremus, infinis, su gósu de sa Virgini Santissima e su devotu servitziu che prestaiat santu Giusèpi a su Bambinu Gesu chi fiat nàsciu.

**E cuntemplendi custu mistériu eus a narri: ... ( 1 Babbu nostru e 10 Ave M.)**

**Offresimentu.** O Virgini poderosissima e beneditissima Mama de nostru Sennori, gósu sempiternu: nosàterus bos offereus umilmenti custas dèxi Ave Marias e unu Babbu nostu, a su gósu chi s'ànima bosta at tentu candu de is Virginalis intrànnias bostas, po su rescatu de su géneru umanu, su Fillu de Deus nascetit, e cun gósu e riveréntzia ammiràbili in pòberus pannus fasciau e aintru de una mandiadroxa de animalis collocau suba duru fenu e pala, in mesu a duus animalis, comentis verdaderu Deus dd'adoretis, in su cali nascentu is còrus Angelicalis cantesint: "Glória a Deus in is alturas de is cèlus e paxi in sa terra a is óminis de sa bona voluntadi sua".

Pro cuddu partu diciosu  
chi apegis sena dolore  
parturinde su Segnore  
cun inefabile gósu  
sola cun solu s' Isposu  
ricos in sa pobertade!

O Reina de su Rosàriu,  
sos divotos amparade!

**Oratzioni.** Bos supplicamus, nos alcantzeis de custu Fillu bostu pretziosu amori de sa pobe-resa vertadera: chi, apartaus de is cosas de su mundu, ddu potzaus perfettamenti serbiri, e continuamenti nàsciat in nosàterus cun d-unu fervori nou de caridadi. Amen Gésus.

**SU DE CUARTU MISTÉRIUS IN GÓSU**  
**Sa presentazioni de su Bambinu Gesùs a su Templu  
e s'adoratzioni de is Tre Reis**

**In su de quartu mistérius eus a considerai:**

- 1) Comenti sa Virgini Santissima, depustis di èssiri stau su Fillu suu preziosissimu de is Àngelus glorificau, de is pastoris visitau e de is tres Rèis de s'Orienti adorau, ddu portesit a su Templu de Gerusalèmi po ddu presentai a su Babbu Eternu, offerendi su pipiu Gesu cun d'una offerta de poberus, assuggetendusi issa pustis de coranta diis a sa lèi de sa Purificat-zioni.
- 2) Comenti su santu bécciu Simeoni (chi tantu disigiada biri custa dii) ddu portesit in is bratzus suus, nendu cuddu dolci càntigu: *Immoi, O Sennori, manda in paxi su serbidori tuu, poita chi is ogus mius ant bistu su Salvadori de su mundu.*
- 3) Comenti fiat stau connotu de sa santa fiuda Anna, chi inni fiat presenti, e in cuss'ocasioni a preséntzia de totus alabesit e glorifichesit a su Sennori.

**E cuntemplendi custu mistériu eus a narri... ( 1 Babbu nostru e 10 Ave M.)**

**Offresimentu.** O Virgini Santissima e benaventurada, giardinu de totus is virtudis: nosàterus bos offereus umilmenti custas dèxi Ave Marias e unu Babbu nostu, po su gósu chi eis arriciu, candu depustis di èssiri stau Fillu bostu glorificau, visitau e adorau, cumplidas is coranta diis, ddu portesit a su Templu po ddu presentai a s'Eternu Babbu, aundi de su Santu bécciu Simeoni e de sa Santa fiuda Anna fiat stau connotu e de issus in preséntzia de totus cunfessau.

Pro cuddu gósu dobladu  
chi tenegis in su còro  
mirende cuddu tesòro  
chi a Figiu 'ostru an donadu  
sos rees chi lu an adoradu  
cun profunda umilidade!

O Reina de su Rosàriu,  
sos divotos amparade!

**Oratzioni.** Bos supplicamus, nos presentéis comentis umilis serbidoris bostus a sa divina preséntzia, po chi divinamenti in su santu Templu suu e in dónnia lógu potzaus prenuntzai e confessai sa glòria e is laudis de su Sennori. Amen Gésus.

**SU DE CINCU MISTÉRIUS IN GÓSU**  
**S' incontru de Gesù in mesu a is Dottoris in su Templu**

**In su de cincu mistérius eus a considerai:**

- 1) Comenti su pipiu Gesù, essendi giai a s'edadi de dox'annus, fiat andau cun su Babbu e Mama sua a su Templu de Gerusalèmi, segundu su connotu, po sa festa, e comenti issus partisint de Gerusalèmi pentzendi chi fessit in sa cumpangia.
- 2) Comenti sùbitu chi s'accatesint chi non fiat cun issus, dd'hant circau po tres diis tra is parentis e connotus insoru, e no aendiddu agatau fiant torraus cun ànsia meda a Gerusalèmi, aundi dd'incontresint in mesu a is Dottoris, iscurtendiddus e preguntendiddus.
- 3) Comenti Gesù si ndi torresit in cumpangia bosta a sa cittadi de Nazaret, aundi istàt sughettu a bosu e a Santu Giusèpi, sposu bostu, e impari cun bosu cresciat in sciéntzia e in edadi, ananti de Deus e de is óminis.

**E cuntemplendi custu mistériu eus a narri:** ... ( 1 Babbu nostru e 10 Ave M.)

**Offresimentu.** Nosta Sennora de su Rosàriu, amparu e consolu de is affligius: nosàterus bos offeruus umilmenti custas dèxi Ave Marias e unu Babbu Nostu, a su gósu chi eis arriciu impari cun santu Giusèpi, candu apustis de su dólu de s'ànima bosta po ai pérdiu su pipiu Gesù, luxi de is ogus bostus, dd'agatestis pustis de tres diis in su Templu in mesu de is Dottoris, iscurtendiddus e preguntendiddus, e issu si ndi torresit in cumpangia bosta a sa cittadi de Nazaret, aundi est istau sughettu a bosu e a Santu Giusèpi, sposu bostu.

Pro cuddu grande consolu  
chi Gesù bos at dadu  
pustis de l' aer chircadu  
tres dies cun pena e dolu,  
cand' inter dottores solu  
disputat sa veridade. O Reina...

**Offresimentu po is cincus mistérius.** O Virgini Santissima Maria, nosàterus bos offeruus umilmenti custa primu parti de su preziosissimu Rosàriu bostu in riveréntzia de is cincus mistérius in gósu: bos suplicamus, Sennora nosta, siais abogada nosta in sa vida e in sa morti, e nos alcantzeis de Fillu bostu benedittu perdonu de is pecaus nostus, e gràtzia particulari chi ddu potzaus serbiri, e agabeus in su santu serviziu suu. O Virgini Maria, Mama de gràtzias e de misericórdia, succurreinosi in is necessidadis nostas spiritualis e temporalis, e bos incumandaus su stadu de sa Santa Crésia, mama nosta, et de totu is pòpulus e natzionis, comenti puru a totu is parentis nostus, amigus e benefattoris, bius e mortus, in sécula seculorum. Amen.

**Oratzioni.** Bos suplicamus, nos alcantzeis interu consolu in is tribulatziònis, e conformidadi cun sa voluntadi de Deus, po chi cun perfetta umilidadi e ubbidientià serbaus a sa Divina Magestadi; alcantzainosi, si calincuna borta ddu perdeus, chi nisciunu riposu si agatit is ànimas nostas, finzas a tantu chi ddu torreus a incontrai po essiri funtana, vida e consolu de is affligius, suavidadadi de is còrus nostus e vida de is vidas nostas. Amen Gésus.

**SEGUNDU PARTI : MISTÉRIUS IN DÓLU**

**PRIMU MISTÉRIU IN DÓLU**  
**S'oratzioni de Gesù in s'ortu de Getsèmani**

**In custu primu mistériu in dólu eus a considerai:**

- 1) Comenti su benedittu Gesù, depustis de ai accabada sa cena, si partisint cun is iscientis suos a s'ortu de Getzèmani, e candu fut lómpiu ddis iat nadu: *Pregai, po arresisti a s'ora trista.*
- 2) Comenti, stesiau de issus unus cantus passus, si fut postu a pregai: *Babbu miu, si bolis, boganci a illargu de mei custu calici de dolori. Cun totu custu, no siat fatta sa voluntadi mia, ma sa tua.*
- 3) Comenti fun beníu unu àngelu de su celu po ddu cunfortai, e in cuss'ora pregat ancora de prus, e su sudori suu lompiat a terra, e pariant stiddius de sànguni.

**E cuntemplendi custu mistériu eus a narri...** ( 1 Babbu nostru e 10 Ave M.)

**Offresimentu.** Nosta Sennora de su Rosàriu, Mama de misericórdia: nosàterus bos offeruus umilmenti custas dèxi Ave Marias e unu Babbu nostu, in memòria de cuddu mistériu in dólu, candu su gloriosu Fillu bostu iat pregau in s'ortu a su Babbu Eternu po èssiri in fortzas de fai sa voluntadi sua fintzas a s'últimu, e pustis de unu iscienti suu fiat stau traixiu e intre-gau in manus de is cruelis soldaus, e accapiau a is manus, e cun d'una funi a su zugu, cun meda cruelidadi e fieresa, fiat stau portau a dòmu de su Pontifizi Annas.

Contra sa malignidade  
de su comunu adversariu,  
O Reina de su Rosàriu,  
sos divotos amparade!

Pro cudda grande agonia  
Chi sentegis, et dolore,  
Cando de samben sudore  
in s' ortu Jesu ispargiat,  
ca sa morte ispettaiat  
cun tanta tanta impiedade .

O Reina de su Rosàriu,  
sos divotos amparade!

**Oratzioni.** Babbu nostu soberanu, Bos suplicamus, nosi alcantzeis de sighiri s'esemplu de oratzioni de su Fillu bostu istimau, e chi in is oras tristas nostas e traballus nos uniformeus a sa voluntadi de su Sennori e suffraus totu cun passiéntzia. Amen Gésus.

**SU DE DUUS MISTÉRIUS IN DÓLU**  
**Sa flagellatzioni de Gesu Cristu a sa columna**

**In su de duus mistériu in dólù eus a considerai:**

- 1) Comenti in su palàtziu de su Predi Maiori is guardias chi castiànt a Gesus ddu insultànt e dd'arropànt, e, apustis de dd'ai bendau is ogus, ddi domandànt: *Faiddu immói su profeta, e Intretza chini t'at fertu!*
- 2) Comenti, in sa corti de su palàtziu, Pedru, sétziu cun is àterus acanta de su fogu, e ar-reconnotu comenti de iscienti de Gesus, po tres bortas iat frastimau de no connòsciri a su maistu suu.
- 3) Comenti, a sa fini de su processu, apustis de àiri reconnotu po tres bortas s'innocéntzia de Gesus, Pilatu dd'iat intregau in is manus de is sordaus, chi dd'ant spollau, dd'ant acapiau a una columna e aciotau a sànguni.

**E cuntemplendi custu mistériu eus a narri: ...** ( 1 Babbu nostru e 10 Ave M.)

**Offresimentu.** Nosta Sennora de su Rosàriu, nosàterus bos offereus umilmenti custas dèxi Ave Marias e unu Babbu nostu, in memòria de su dolori chi Fillu bostu at provau, candu cuddu chi bestit is celus de ermosura e su chi est prus bellu de totus is fillus de is óminis, fiat stau in preséntzia de totus spollau e sbregungiu, accapiau a una columna e de is barbarus ministrus crudelissimamenti aciotau.

Pro cuddu dolu sobradu  
chi apegis Virgine trista  
cun sa lamentosa vista  
de unu Deus flagelladu  
a sa columna ligadu  
sen'alguna piedade.

O Reina de su Rosàriu,  
sos divotos amparade!

**Oratzioni.** Deus, Babbu nostu misericordiosu, bos suplicamus, nos alcantzeis chi, arregordendi s'esemplu de Santu Perdu, comenti de issu potzaus furriai de pentzamentu e apartai de nosàterus dónnia presuntzioni e superbia, aici de pòdiri patiri affrontus e ingiùrias po su Sennori nostu Gesu Cristu, chi immói bivit e rénniat po totu is sèculus de is sèculus. Amen Gésus.

**SU DE TRES MISTÉRIUS IN DÓLU**  
**Gesu coronau de spinas**

**In su de tres mistériu in dólù eus a considerai:**

- 1) Comenti is sodraus, apustis de àiri aciotau a Gesu Cristu, dd'ant postu in conca una corona de ispinas, dd'ant bestiu cun d-unu mantu arrùbiu, e ddi narànt: *Deus ti salvit, su rèi de is Giudeus!*
- 2) Comenti Gesu fut bessiu a foras, portendu sa corona de ispinas e su mantu arrubiu, e Pilatu dd'iat amostau a sa genti, nendiddis: *Castiaiddu, cust'òmini!*
- 3) Comenti bidendiddu, is predis maioris e is guàrdias si fiant postus a aboxinai: *A sa gruxi! A sa gruxi!* E comenti infinis Pilatu dd'iat intregau a manus insoru po chi fessit apicau a sa gruxi.

**E cuntemplendi custu mistériu eus a narri: ...** ( 1 Babbu nostru e 10 Ave M.)

**Offresimentu.** Nosta Sennora de su Rosàriu: nosàterus os offereus umilmenti custas dèxi Ave Marias e unu Babbu nostu, in memòria de su dolori chi Fillu bostu e Sennori nostu Gesu Cristu at patiu candu de is cruelis buginus si ddi fiat stada inclavada una corona de pungentissimas spinas.

Pro sa sensible pena  
chi apegis, santa matrona,  
pro sa ispinosa corona,  
chi oscuresit sa serena  
cara de bellea piena,  
chi respiràt santidade.

O Reina de su Rosàriu,  
sos divotos amparade!

**Oratzioni.** Deus eternu e Babbu soberanu, rèi verdaderu de su mundu, donanosì de podi cumprèndiri, arregordendi Gesu incoronau de ispinas e arrefudau, fintzas a ita puntu de violéntzia de s'unu contra s'àteru podeus lómpiri, candu si poneus a meris de sa beridadi e de sa giustitzia. Tui chi bivis e rénnias po totu is sèculus de is sèculus. Amen Gésus.



**SU DE CUARTU MISTÉRIUS IN DÓLU**  
**Su viàggiu de Gesu Cristu a su Calvàriu cun sa gruxi a pala**

**In su de quartu mistériu in dólù eus a considerai:**

- 1) Comenti Pilatu iat liberau a Barabba e iat lassau Gesu a sa voluntadi insoru, e dd'iant carriu de sa gruxi innui ddu depiant crucifissai.
- 2) Comenti, in su mentris chi nci ddu ingolliant a su cùccuru de su Calvàriu, iant firmau unu tali chi fiat furriendi de su sartu, Simeoni su de Cirene, e dd'iant atuau sa gruxi sua po dda portai infatu suu.
- 3) Comenti in is arrugas de Gerusalèmi ddu sighiat sa genti a trumas, e féminas medas chi tzerriant agitóriu po issu. E Gesu si fiat girau faci a issas e ddis iat nau: *Fillas de Gerusalèmi, no prangeis po mèi, ma prangei po bosàterus e totu e po is fillus de bosàterus. Poita, si trattant aici sa linna frisca, ita at a essi de cussa siccada?*

**E cuntemplendi custu mistériu eus a narri...** ( 1 Babbu nostru e 10 Ave M.)

**Offresimentu.** Nosta Sennora e su Rosàriu: nosàterus bos offereus umilmenti custas dèxi Ave Marias e unu Babbu nostu in memòria de su dolori chi sa Santissima ànima bosta at provau, candu eis bistu portai a s'amau Fillu bostu peri is arrugas de Gerusalèmi, cundennau a morti comenti avolotadori de is pòpulus, portendu cudda pesanti gruxi a palas, e cun custas ndi seis aturada meda affligida e dolorosa.

Pro cuddu assustu tremendu  
chi bos tochesit su còro,  
cando figgiu vostru de òro  
passat in tantu istruèndu  
cun cuddu pesu istupèndu  
de sa rughe in sa citade.

O Reina de su Rosàriu,  
sos divotos amparade!

**Oratzioni.** Babbu nostu misericordiosu, Bos suplicamus, nosi alcantzeis interu sentimentu e compassioni de còru in cussus doloris chi Fillu bostu at patiu, e comenti de Simoni su de Cirene siaus prontus a si donai agiudu is unus cun is àterus, po lòmpiri comenti iscientis infatu tuu fintzas a s'òra de sa glòria, in sa resurrezzioni de sa vida eterna, po totu is sèculus de is sèculus. Amen Gésus.

**SU DE CINCU MISTÉRIUS IN DÓLU**  
**Sa crucifixioni e morti de Gesu Cristu**

**In su de cincù mistériu in dólù eus a considerai:**

- 1) Comenti, candu fiant lòmpius a su cùccuru de su Calvàriu, iant spollau a Gesu Cristu e iant apicau a sa gruxi a issu e a àterus duus, bandidus, unu a manu dereta e s'àteru a manu manca sua. E Gesu narat: *Babbu miu, perdonaddus, ca no scint su chi funt fadendi.*
- 2) Comenti unu de is duus bandidus dd'iat nau: *Gesu, arregodadi de mèi candu as a torrai in su rénniu tuu.* E Gesu dd'iat arrespustu: *Deaderus ti ddu naru: oi e totu as a bénniri cun mèi in paradisu.*
- 3) Comenti, a s'òra de mesudi, Gesu a boxi manna iat nau: *Babbu miu, in is manus tuas intrègu su spìritu meu.* E apustis de custus fuèddus, fut spirau. S'ufficiali romanu, bidendi su chi suzzediat, iat nau: *Cust'òmini fut diaderu un òmini giustu.*

**E cuntemplendi custu mistériu eus a narri...** ( 1 Babbu nostru e 10 Ave M.)

**Offresimentu.** Nosta Sennora du Rosàriu, nosàterus bos offereus umilmenti custas dèxi Ave Marias e unu Babbu nostu in memòria de su dólù chi eis provau a pèis de sa gruxi, ma puru de su consólù chi su matessi fillu bostu bos at donau cun is ùltimas paraulas suas acinnendi a s'iscienti suu prus istimau chi fiat a costau bostu: *Sa fémina, eccus a fillu tuu.* E a issu iat nau: *Eccus a mama tua.*

Pro cudda crudele ispada,  
chi s'alma bos traspasesit,  
cando a Gesu inclavesit  
sa zente depravada  
colmende cun sa lantzada  
sa barbara crudeltade.

O Reina...

Pro cuddu forte lamentu  
chi fategis dolorosa,  
cando in sos bratzos penosa  
isclavadu lu agis tentu  
mirende su chelu atentu  
tantu rara piedade.

O Reina...

**Offresimentu po is cincus mistériu.** O Virgini Santissima Maria, chi Gesu matessi s'at bòffiu donai po mama nosta, nosàterus bos offereus umilmenti custas segunda parti de su preziosissimu Rosàriu bostu in riveréntzia de is cincus mistériu in dólù: bos suplicamus, siais abogada nosta in sa vida e in sa morti e nos alcantzeis de Fillu bostu benedittu perdonu de is pecaus nostus e gràtzia particolari chi ddu potzaus serbiri e agabeus in su santu serviziu suu. O Virgini Maria, Mama de gràtzias e de misericórdia, succurreinosi in is necessidadi nostas spiritualis e temporalis, e bos incumandaus su stadi de sa Santa Crésia, mama nosta, et de totu is pòpulus e natzionis, comenti puru a totu is parentis nostus, amigus e benefattoris, bius e mortus, in sècula seculorum. Amen Gésus.

**Oratzioni.** Babbu nostu soberanu, chi in puntu de morti as arriciu sa vida de su fillu tuu Gesu Cristu po sa resurrezzioni in sa poténtzia de su Spìritu santu, donanosì sentimentu vertaderu de sa passioni de nostu Sennori Gesu Cristu, po chi morgiaus cun vertaderu dolori a is pecaus nostus e potzaus bivì una vida noa cunfromma a su batiari chi eus arriciu. Amen Gésus.

**PRIMU MISTÉRIU IN GLORIA**  
**Sa Resurrezioni de Gesu Cristu**

**In custu primu mistériu in glória eus a considerai:**

- 1) Comenti sa primu dì de sa cida, a mangianeddu, is féminas fiant andadas a sa tumba de Gesus, portendi is profumus chi iant aprontau, iant biu sa pedra arrumbulada, ma, intradas a sa tumba, no iant agatau su corpus de Gesus.
- 2) Comenti sa bòxi de is àngelus iat nau a is féminas: *Poita ddu seis cichendi in mesu de is mortus, issu chi est biu? No est innoi, ma est stètiu resuscitau.*
- 3) Comenti su Risortu si fiat presentau a is féminas e a is iscientis suos, e fut istètiu reconnotu de is duus iscientis de Emmaus, a su momentu de pratziri su pani.

**E cuntemplendi custu mistériu eus a narri...** ( 1 Babbu nostru e 10 Ave M.)

**Offresimentu.** Nosta Sennora de su Rosàriu, nosàterus bos offereus umilmenti custas dèxi Ave Marias e unu Babbu nostu a s'ineffabili gósu chi eis tentu in sa gloriosa Resurrezziòni de su Fillu bostu istimau, candu de siguru a bosu si presentesit innantis de totus, gloriosu e triumfanti resuscitau, e su dólu bostu si cambiesit in summa alegria, e depustis in signali de su grand'amori suu s'appresenteit a is santas féminas e medas bortas a is apòstolus e iscientis suos.

Contra sa malignidade  
de su comunu adversariu,  
O Reina de su Rosàriu,  
sos divotos amparade!

Pro cudda suprema glòria  
chi apegis sena iguale,  
resuscitende immortale  
coronadu de vittoria,  
Gesus, fatende notòria  
sa sua divinidadade.

O Reina de su Rosàriu,  
sos divotos amparade!

**Oratzioni.** Babbu nostu soberanu, funtana d'eterna vida, bos supplicaus de nos alcantzai verdaderu gósu de sa bona cunsciéntzia e chi is ànimas nostas resuscitint a vida noa e costùminis nous. Amen Gésus.

**In su de duus mistérius in glória eus a considerai:**

- 1) Comenti cumplidas is coranta diis de sa Resurrezziòni, su Sennori Gesus si fiat appresentau s'ultima borta a is ùndixi iscientis suos chi staiant ritiraus.
- 2) Comenti ddu at portaus a su Monti de Is Olivàriu, de undi si dispedesit de issus e de sa Virgini Mama sua.
- 3) Comenti, pesadas is manus a celu, iat benedixiu a is iscientis suos, e mentris ddu benedixiat, si fut stesiau de issus e fut arziau facias a is cèlus, lassendi plenus de amori e de speràntzia totu cuddus chi in fidelidadi ddu depiant serbiri in sa terra.

**E cuntemplendi custu mistériu eus a narri...** ( 1 Babbu nostru e 10 Ave M.)

**Offresimentu.** Nosta Sennora de su Rosàriu, nosàterus bos offereus umilmenti custas dèxi Ave Marias e unu Babbu nostu a s'allegria e gósu chi eis tentu in sa gloriosa Ascensioni de Fillu bostu e Sennori nostu, candu ddu eis bistu artziendi a is Celus, aundi est sétziu a sa manu deretta de Deus su Babbu, e lassendu a bosu, o Sennora nosta, maista de sa santa scola sua.

Pro cuddu grande allegrone  
chi apegis, Virgine pura,  
Gesus volende a sa altura  
in celeste processione,  
dada sa benedissione  
cun meda solemnidade.

O Reina de su Rosàriu,  
sos divotos amparade!

**Oratzioni.** Babbu de s'eterna glòria, chi in su Cristus sétziu a sa manu dereta bosta nos amostais sa matessi umanidadi nosta artziada a costau bostu, bos supplicamus, nos alcantzeis cun s'agiudu de su Spìritu santu de bìviri comenti mèrmus dignus de su corpu suu, cun sa speràntzia de ddu podi sodigai in sa glòria. Amen Gésus.



**SU DE TRES MISTÉRIUS IN GLÓRIA**  
**Sa benida de su Spìritu Santu asuba de is Apòstulus e de Maria Santissima**

**In su de tres mistériu in glória eus a considerai:**

- 1) Comenti su Bonu Maistu e Pastori iat promìtiu de no lassai is iscientis suos desconsolaus, e de ddis mandai su Spìritu Consolatori.
- 2) Comenti, cumplidas is dii de Pasca 'e Froris, istendu cun is iscientis suos sa Virgini Santissima, ddis mandat su Spìritu Santu in figura de linguas de fogu.
- 3) Comenti issus, plènus de su Spìritu Santu, cun sa fortza chi iant arriciu, fiant bessius a prenuntzai sa Bona Nova de Gesus resuscitau, e comenti totus is chi ddus ascurtanta, de dònna pópulu e naziòni, ddus cunprendiant in sa pròpriu lingua.

**E cuntemplendi custu mistériu eus a narri...** ( 1 Babbu nostru e 10 Ave M.)

**Offresimentu.** O Signora Mama de Deus e Mama de is orfanus, Consoladora de is desconsolaus: nosàterus bos offereus umilmenti custas dèxi Ave Marias e unu Babbu nostru po s'allegria chi eis tentu in su sagrau mistériu de sa benida de su Spìritu Santu, candu in figura de linguas de fogu abbascesit asuba de is iscientis e inflammesit tantu is còrus insoru, chi subitu comentzesint a prenuntzai sa Bona Nova, e totus ascurtàn in sa pròpriu lingua is óperas mannas de Deus.

Pro cudd' allegria summa  
chi s' alma vostra sentesit  
cando bos suvrabengesit  
sa ave de divina puma  
chi sos coros totu allumat  
in fogu de caridade.

O Reina de su Rosàriu,  
sos divotos amparade!

**Oratzioni.** Bos suplicamus, po custu gloriosu mistériu nos alcantzeis chi nosàterus mere-sciaus arriciri su Spìritu Santu in is ànimas nostas e chi siaus fortificaus cun sa gràtzia sua, po chi prus no ddu offendaus, e continuamenti ddu potzaus serbiri. Amen Gésus.

**SU DE CUARTU MISTÉRIUS IN GLÓRIA**  
**S' Assunziòni de Maria Santissima a su Celu**

**In su de quartu mistériu in glória eus a considerai:**

- 1) Comenti Gesu Cristu Sennori nostru at bóffiu premiai is dòlus de sa Santissima Mama sua.
- 2) Comenti, lómpia s'òra de sa diciosa morti sua (comenti pìedosamente si podit crei), accumpangiada de milliaris de Angelus, Gesus dd'at arricia torra in sa glória, in corpus e in ànima.
- 3) Comenti s'est avverada primeramenti po sa Mama sua su dèciu de Gesus a is iscientis suos: *Dèu andu a s'aprontai su logu. Et de su logu aundi andu dèu, bosàterus connoseis sa bia.*

**E cuntemplendi custu mistériu eus a narri...** ( 1 Babbu nostru e 10 Ave M.)

**Offresimentu.** O Alta Signora, Reina de is Cèlus: nosàterus bos offereus umilmenti custas dèxi Ave Marias e unu Babbu nostru a su gloriosu mistériu de s'Assunzioni bosta, candu su Fillu bostu bos at arriciu in sa glória eterna, Mamma amorosa de su Sennori de totus.

Pro cudd' allegria pregunta,  
Qui sos Anguelos fatesin,  
Quando altzare bos videsin  
Subra totu issos assumpta,  
Suavemente disunta  
Pro viver sa eternidade.

O Reina de su Rosàriu,  
sos divotos amparade!

**Oratzioni.** Bos suplicamus, chi siais Abogada nosta in dònna logu e in dònna tempus, e in s'òra de sa morti nosta nosi defendais de is trassas de su Demóniu, po chi is ànimas nostas potzant andai a gosai su Deus e Sennori nostru po totu s'eternidadi. Amen Gésus.

## SU DE CINCU MISTÉRIUS IN GLÓRIA

### S'incoronatzioni de Maria Santissima asuba de is Angelus e de totu is Santus

#### In su de cincus mistérius in glória eus a considerai:

- 1) Comenti sa Mamma de Deus fiat stada arricida cun grandissima allegria e cànticus celestialis de is còrus de is Àngelus e de totu is Santus e Santas de su Celu.
- 2) Comenti fiat stada coronada de sa Santissima Trinidadadi po Reina de su Celu e constituida po Signora de is Angelus, abogada de su géneru umanu e tesorera de is benis celestialis.
- 3) Comenti dèxit a glorificai e alabai a sa Santissima Trinidadadi po àiri tantu inaltzau a custa Sennora, issa chi in su mundu fiat istétia sa prus ùmili de totus is creaturas.

#### E cuntemplendi custu mistériu eus a narri... ( 1 Babbu nostru e 10 Ave M.)

**Offresimentu.** Nosta Sennora de su Rosàriu, totu speràntzia nosta pustis de Deus: nosàterus bos offereus umilmenti custas dèxi Ave Marias e unu Babbu nostu a su mistériu gloriosu de sa coronatzioni bosta, chi fiat su cumplimentu de totu is gòsus e recumpensa de is grandus merescimentus bostus, candu seis istétia inalzada suba is àngelus, e de sa Santissima Trinidadadi, Babbu Fillu e Spìritu Santu, coronada e constituida po Sennora e Reina, Patrona e Abogada de totu cuddus chi de coru a bosu s'incumandant.

Pro su jubilu estremadu  
chi gosades in eternu,  
cun su absolutu governu  
chi Deus bos at donadu,  
cando bos at coronadu  
subra dónia potestade. O Reina...

**Offresimentu po is cincus mistérius in glória.** Nosta Sennora de su Rosàriu, saludi de is chi in bosu tenint cunfianza, nosàterus bos offereus umilmenti custa tertza parti de su preziosissimu Rosàriu bostu, in riverèntzia de is cincus mistérius in glória. Bos suplicamus, siais abogada nosta in sa vida e in sa morti, e nos alcantzeis de Fillu bostu beneditu perdonu de is pecaus nostus e gràtzia particulari chi ddu potzau serbiri, e agabeus in su santu serviziu suu. O Virgini Maria, Mama de gràtzias e de misericórdia, succurreinosi in is necessidadias nostas spiritualis e temporalis e bos incumandaus su stadu de sa Santa Crésia, Mamma nosta, e de totu is natzionis, e bos incumandaus puru totus is parentis nostus, amigus e benefattoris, bius e mortus, in secula seculorum. Amen Gésus.

**Oratzioni.** Bos suplicamus, Sennora nosta gloriosissima, si digneis nos alcantzai dónus e gràtzias abundantis, a custus indignus serbidoris bostus chi biveus in custa valle de lagrimas, po chi meresciaus alcantzai sa vida eterna, gosèndu de sa presèntzia bosta Santissima cun su Babbu, cun su Fillu e cun su Spìridu santu. Amen Gésus.

## PRIMU MISTÉRIU DE LUXI

### Giuanni Batista bàtiat Gesu a su riu Giordanu

#### In su primu mistériu de luxi eus a considerai:

1. Comenti Giuanni Batista s'èst presentau in su desertu prenuntziendi a furriai de pentzamentu, ca fiat po lòmpiri infatu suu unu prus forti de issu, chi depiat batiai in Spìritu santu po su regnu de Deus.
2. Comenti Gesu benit de sa Galilea a su riu Giordanu po si fai batiai de Giuanni, in mesu de de totu is àterus, e aici s'at ammostau comenti dèxit a fai sa voluntadi de Deus totu intera.
3. Comenti, candu Gesu fut istétiu batiau, si funt abertus is celus e Gesu at biu su Spìritu abascendi che columba e benendi a pitzus suu, e sa boxi de su Babbu eternu dd'at prenuntziau Fillu suu Istimau, a su modu de Isaccu, fillu istimau de Abram, su babbu suu.

#### E cuntemplendi custu mistériu eus a narri... ( 1 Babbu nostru e 10 Ave M.)

Opp.

As incarnadu, Maria,  
Su Misteru de s'Amore :  
**In su Misteru nos ghia**  
**De sa vida de su Segnore.**

#### Primu misteru de sa lughe. Cuntemplamos:

Gesu cando a su Giordanu	E appenas batizadu
Andat pro si batizare,	In su chelu apertu at vidu
A su Divinu Pianu,	S'Ispìridu 'e Deus faladu
Chi su mundu dèt sarvare,	Che de columba vestidu.
Resolutu ponet manu,	E su Babbu l'at giamadu:
Send' isse su Sarvadore.	«Fizu meu 'e tant' amore».

**Offresimentu.** Nosta Sennora de su Rosàriu, nosàterus bos offereus umilmenti custas dèxi Ave Marias e unu Babbu nostu cuntemplèndi su mistériu de Gesu Cristu, chi, fendisi batiai a su riu Giordanu, de innocenti chi fiat s'èst postu totu de sa parti de is peccadoris, e morendi in sa gruxi s'èst ammostau fillu amau e amanti de Deus e de is òminis.

**Oratzioni.** Deus soberanu e Babbu nostu amantíssimu, bos eis cunsagrau cun Spìritu santu su Fillu bostu Istimau e ddu eis postu a luxi de su mundu e a paxi po totu is pòpulus: a nosu chi arregordaus su mistériu mannu de su bàtiu suu a su riu Giordanu, donainosi de pòdiri sèmpiri fai in totu sa voluntadi bosta, comenti de fillus bostus istimaus, prontus a torrai a bos e a is àterus s'amori chi eus arriciu. Amen Gésus.

**SU DE DUUS MISTÉRIUS DE LUXI**  
**A sa cóia in Cana 'e Galilea Gesus incumintzat is operas suas**

**In su de duus mistérius de luxi eus a considerai:**

1. Comenti ddu' iat istètiu una festa de cóia in Cana de Galilea e ddui fiat innìa sa mamma de Gesus, e comenti issa fiat istétia pronta a avverti su fillu suu ca fiat spaciau su binu de sa festa.
2. Comenti Gesus at fatu a cumprèndi a sa mamma sua ca sa fini de su binu s'iat essi furriada no a bregùngia ma a glòria, donendi issu unu binu nou, mellus de prima, a su modu e totu de s'ora manna sua, candu issu matessi, de 'su spaciau' in sa morti est passau a essi "su primu de i biventis" in sa resurrezzioni.
3. Comenti sa mamma de Gesus fiat istétia sa primu a cumprèndi ca fut arribada s'ora de pònniri in menti a sa paràula de su fillu, e de andai infatu suu comenti iscientis infatu a su maistu.

**E cuntemplendi custu mistériu eus a narri...** ( 1 Babbu nostru e 10 Ave M.)

**Opp. : Segundu misteru de sa lughe. Cuntemplamos:**

Gesus cando, cumbidadu	L'avvertis preocupada :
In Cana a un'isposonzu,	«Fizu, su vinu est finidu!»
S'abba in vinu at cambiadu,	«S'Ora non est arrivada!»,
Tue l'as vidu su bisonzu:	Dur' isse t'at respondidu.
Sa festa t'as abbizadu	«Faghide su chi bos nada»,
Chi fit perdende sapore.	Nàs a donzi servidore.

In su Misteru nos ghia  
De sa vida de su Segnore.

**Offresimentu.** Nosta Sennora de su Rosàriu, nosàterus bos offerèus umilmenti custas dèxi Ave Marias e unu Babbu nostu cuntemplendi su mistériu de su rénniu de Deus, innui, a su travessu de su mundu, e segundu is paràulas e s'esémpiu de Gesu Cristu, fillu bostu, is ùltimus funt primus e is primus ùltimus.

**Oratzioni.** Deus, creadori de is celus, luxi suba sa terra nosta, chi nos eis mandau su Verbu eternu po nos annuntziai sa festa chi bos e totu nos eis preparau in sa eterna dòmu bosta: donainosì cun s'illuminatziòni de su Spiritu santu de cumprèndi sa Bona Nova de Gesus, e comenti is serbidoris a sa cóia in Cana de Galilea potzaus pònniri in menti a su fueddu de sa Mama, de fai totu segundu sa paràula de Gesus, fillu suu, issu chi immói bivit e rénniat po totus is sèculus de is sèculus. Amen Gésus.

**SU DE TRES MISTÉRIUS DE LUXI**  
**Gesus prenúntziat su regnu de Deus e a furriai de pentzaméntu**

**In su de tres mistérius de luxi eus a considerai:**

1. Cométi Gesus, apustis chi Giuanni fut istètiu intregau a sa giustìtzia, fut andau a Galilea po annuntziai sa Bona Nova de Deus e naràt: *Su tempus est immói, s'arrènniu de Deus s'est acostiau; furriai de pentzamentu e creéi a sa Bona Nova.*
2. Cométi Gesus donàt fortza e cresa a is paràulas suas cun paràbulas e sinnus mannus, sanéndi a is malàidus e perdonéndi a is peccadoris.
3. Cométi Gesus, a meri de sa di de sa resurrezzìoni, fut bénniu anca fiant is iscientis e ddis iat nau: *Paxi a bosatrus. Comenti su Babbu Mannu at mandau a mimi a su mundu, aici e totu deu mandu a bosàterus. Arriceì Spiridu santu. A chini perdonais is pecaus, ddis funt perdonaus.*

**E cuntemplendi custu mistériu eus a narri...** ( 1 Babbu nostru e 10 Ave M.)

**Opp. : Tertzu misteru de sa lughe. Cuntemplamos:**

Cando Gesus est essidu	«Mudade mentalidade
Annuntziende a sa zente:	E credide a su Vanzelu! ».
«Como est su tempus cumpridu,	E mustrat sa veridade
Su Regnu 'e Deus chereute».	Chi est caminu a su Chelu.
E cussas terras ant vidu	Intendet s'umanidade
Lugh' in tantu iscuricore.	Sa nova bella 'e s'amore!

In su Misteru nos ghia  
De sa vida de su Segnore.

**Offresimentu.** Nosta Sennora de su Rosàriu, nosàterus bos offerèus umilmenti custas dèxi Ave Marias e unu Babbu nostu cuntemplendi su mistériu de Gesus, verbu eternu, maistu nostu misericordiosu, chi nos at annuntziau cun paràulas e cun òperas mannas sa misericòrdia de Deus, rèi nostu soberanu.

**Oratzioni.** O Deus, rèi nostu soberanu, chi eis impromìtiu a is pòburus e a is ùmilis sa festa manna de su rénniu bostu, donainosì de furriai de pentzaméntu e de s'ighiri sa via de su Fillu bostu, Gesu Cristu, maistu mannu de sabidoria, e aici potzaus in is tempus nostus prenuntziai nos puru sa Bona Nova, e èssiri a testimòngius de sa benditziòni e de s'onori chi toccant a is chi Gesus at saludau "biadus" in su rénniu bostu, bos chi biveis e renniais po totus is sèculus de is sèculus. Amen Gésus.

SU DE CUARTU MISTÉRIUS DE LUXI  
Gesùs trasfigurau in su monti

**In su de quartu mistériu de luxi eus a considerai:**

1. Coménti Gesùs, apustis de àiri preannuntziau s'ora de sa passioni sua, iat pigau a Perdu e a Giacu e a Giuanni e ndi ddus iat ingortus a susu, a unu monti artu, in d-unu logu a parti, feti a issu, e fut istètiu tramudau ananti insoru.
2. Coménti a is tres iscientis in su monti ddis fut aparèssiu Allias e Mosè e fiant chistionendi cun Gesùs de sa dispedida sua.
3. Coménti, to' in d-una, una nui in su monti iat imbussau cun s'umbra is tres iscientis e iant inténdiu una boxi de sa nui narendi: *Custu est su Fillu miu istimau, ascurtaiddu!*

**E cuntemplendi custu mistériu eus a narri...** ( 1 Babbu nostru e 10 Ave M.)

**Opp. Quartu misteru de sa lughe. Cuntemplamos:**

Cand'a unu monte artzadu	In tanta felitzidade
Chin Predu, Giuvanne e Giagu	Nât Predu: «Istamus inoghe!»
S'est Gesùs trasfiguradu,	Finit cussa claridade,
E discurrende unu pagu	E s'intendet una voghe:
Chin Mosè e Elia est istadu	«A Fizzu meu ascurtade,
In d'unu mare 'e lucore!	Custu Fizu 'e tant' amore!»

In su Misteru nos ghia  
De sa vida de su Segnore.

**Offresimentu.** Nosta Sennora de su Rosàriu, nosàterus bos offereus umilmenti custas dèxi Ave Marias e unu Babbu nostu cuntemplendi sa glòria de sa divinadi chi luxiat in sa cara de Gesu Cristu, candu sa matessi bòxi de su Babbu mannu dd'at presentau a is iscientis totu spantaus ,po chi dd'essint ascurtau e sighiu fintzas a s'ora de sa passioni, po lòmpiri impari cun issu a s'ora de sa resurretzioni.

**Oratzioni.** Deus de bonidadi e de misericòrdia, chi in sa gloriosa Trasfiguratzioni de Gesu Cristu eis cunfirmau is mistériu de sa fidi nosta cun sa testimonia de sa Lègi antiga e de is Profetas, e nos eis nadu de ascurtai su Fillu ostu istimau: donainosì chi ddu potzau s'ighiri fintzas a peis de sa gruxi, po connòsciri infinis sa resurretzioni sua e sa nosta, e èssiri eredéris impari cun issu de sa vida bosta in su celu. Amen Gésus.

SU DE CINCU MISTÉRIUS DE LUXI  
Gesùs si donat e nos perdonat in su santíssimu Sacramentu de s'Eucaristia

**In su de cincuu mistériu de luxi eus a considerai:**

1. Coménti Gesùs, candu is iscientis fiant papendi s'angioni de sa festa de Pasca manna, iat pigau su pani e iat nau sa benedizioni, dd'iat pratzìu, dd'iat donau a issu e iat nau: *Pigai: custu est su corpus miu.* E aici e totu iat fatu cun su càlix de su binu.
1. Coménti dònna orta chi papaus de su pani e binu cunsagràus in s'Eucaristia, prenuntziaus s'andada de Gesùs e cunfessaus sa resurretzioni sua, fintz'a candu issu in glòria at a torrai.
3. Coménti Gesùs in s'ultima cena s'at amostau fintzas a sa fini s'amori suu po Deus e po is òminis e s'at donau s'esèmpiu de su perdonu chi ponit fini a dònna violéntzia e vinditta.

**Offresimentu.** Nosta Sennora de su Rosàriu, nosàterus bos offereus umilmenti custas dèxi Ave Marias e unu Babbu nostu cuntemplendi su mistériu de s'Eucaristia, candu Gesu Cristu si fait nutrimentu nostu in su pani e binu cunsagraus, sinnus de sa umanidadi sua, misericordiosa e amanti, ch'issu e totu at intregau in is manus de is òminis, po èssiri cun su donu de sa vida e su perdonu sacrificiu agradéssiu chi poni fini a totu is sacrificius e vindittas.

**Offresimentu po is cincus mistériu de luxi.** Nosta Sennora de su Rosàriu, nosàterus bos offereus umilmenti custa tertza parti de su preziosissimu Rosàriu bostu, in riveréntzia de is cincus mistériu de luxi. Bos suplicamus, nos alcantzeis de caminai sèmpiri a sa luxi de sa paràula de su Fillu bostu benedittu po ddu pòdiri gosai eternamenti in sa glòria. Aici siat.

Cando in sa Pascale Chena	«Est su Corpus meu donadu
Chin sos suos cunregadu	Pane vivu, mandigade,
Pro esser s'offerta prena	Est su Samben derramadu
Gesùs mandigu s'est dadu,	Binu 'e nova umanidade».
De vida bundante bena,	Vintu s'antigu peccadu,
A s'òmine peccadore.	Su tempus est de s'Amore.

In su Misteru nos ghia  
De sa vida de su Segnore.

**Offresimentu de su Rosàriu candu si narat in totu is tres partis.** Nosta Sennora, Virgini santissima e mama nosta, umilmenti bos offereus custu Rosàriu, in memòria de is mistériu de sa vida gloriosa de Gesu Cristu: e Bos suplicamus in virtudi de su preziosissimu Rosàriu bostu, e po su valori de is mistériu suos, siais abogada nosta e intercessora in sa vida e in sa morti, e nos alcantzeis de Fillu bostu benedittu perdonu de is pecaus nostus, e gràtzia po ddu pòdiri serbiri, e acabeus is diis nostas in su santu servitziu suu. Amen Gésus.

**Oratzioni.** Deus, Babbu mannu misericordiosu, pastori eternu, chi in Gesu Cristu, fillu bostu, a is angionis de sa pastura bosta nudda fadeis manca: donainosì de pigai parti a sa mesa de s'Eucaristia comenti de fradis chi si perdonant s'unu cun s'ateru, e aici èssiri po su mundu esèmpiu de sa paxi e de sa cuncordia de su rénniu bostu, chi biveis e rennais in is séculus de is séculus. Amen Gésus.

LITANIAS DE SA BEATA VÌRGINI

Kyrie eleison — Christe eleison.  
 Christe audi nos — Christe exaudi nos.  
 Pater de Coelis Deus, — Miserere nobis.  
 Fili Redemptor mundi Deus, — Miserere nobis  
 Spiritus Sancte Deus, — Miserere nobis  
 Sancta Trinitas unus Deus, — Miserere nobis

Sancta Maria	Virgo praedicanda	Stella matutina
Sancta Dei Genitrix	Virgo potens	Salus infirmorum
Sancta Virgo Virginum	Virgo clemens	Refugium peccatorum
Mater Christi	Virgo fidelis	Consolatrix afflictorum
Mater divinae gratiae	Speculum iustitiae	Auxilium Christianorum
Mater purissima	Sedes sapientiae	Regina Angelorum
Mater castissima	Causa nostae laetitiae	Regina Patriarcharum
Mater inviolata	Vas spirituale	Regina Prophetarum
Mater intemerata	Vas honorabile	Regina Apostolorum
Mater amabilis	Vas insigne devotionis	Regina Martyrum
Mater admirabilis	Rosa mystica	Regina Confessorum
Mater boni consilii	Turris davidica	Regina Virginum
Mater Creatoris	Turris eburnea	Regina Sanctorum omnium
Mater Salvatoris	Domus aurea	Regina sine labe originali concepta
Virgo prudentissima	Foederis arca	Regina Sacratissimi Rosarii
Virgo veneranda	Ianua coeli	

Agnus Dei qui tollis peccata Mundi : Parce nobis Domine.  
 Agnus Dei, qui tollis peccata mundi : Exaudi nos, Domine.  
 Agnus Dei, qui tollis peccata mundi: Miserere nobis.

V. Ora pro nobis, sancta Dei Genitrix. R. Ut digni efficiamur promissionibus Christi.

**Oremus**

**Deus**, cuius Unigenitus per vitam, mortem et resurrectionem suam nobis salutis aeternae praemia comparavit: concede, quaesumus, ut haec mysteria sanctissimo Beatae Mariae Virginis Rosario recolentes, et imitemur quod continent, et quod promittunt assequamur.

**Deus**, omnium fidelium pastor et rector, famulum tuum Benedictum quem pastorem Ecclesiae tuae praeesse voluisti, propitius respice: da ei, quaesumus, verbo et exemplo, quibus praeest, proficere; ut ad vitam una cum grege sibi credito, perveniat sempiternam.

**Defende**, quaesumus, Domine, Beata Maria semper Virgine intercedente, istum ab omni adversitate populum, et toto corde tibi prostratum, ab hostium propitius tuere clementer insidiis. Per Christum Dominum nostrum. — Amen.

INNUS A SU SANTÌSSIMU SACRAMENTU

**O salutaris Hostia,**  
 Quae Coeli pandis ostium :  
 Bella premunt hostilia,  
 Da robur, fer auxilium.

Uni trinoque Domino  
 Sit sempiterna gloria :  
 Qui vitam sine termino  
 Nobis donet in Patria. Amen.

**Tantum ergo Sacramentum**  
 Veneremur cernui :  
 Et antiquum documentum  
 Novo cedat ritui :  
 Praestet fides supplementum  
 Sensuum defectui.

Genitori, Genitoque  
 Laus et iubilatio,  
 Salus, honor, virtus quoque  
 Sit et benedictio :  
 Procedenti ab utroque  
 Compar sit laudatio. Amen.

V. Panem de coelo praestitisti eis.  
 R. Omne delectamentum in se habentem.

**Oremus.** Deus, qui nobis sub Sacramento mirabili, Passionis tuae memóriam reliquisti: tribue, quaesumus, ita nos Corporis et Sanguinis tui sacra mysteria venerari, ut redemptionis tuae fructum in nobis iugiter sentiamus. Qui vivis et regnas in saecula saeculorum. Amen.

**Divin' Ostia de Saludi**  
 Chi de sa celesti Corti  
 A nosu is portas aperis,  
 Tui po aggiudu nostu accudi  
 Fendisi fortis gherreris  
 Immói e in s'ora de sa morti.

Gloria a Deus chi est unu in sèi,  
 E a donniuna de is Personas  
 Siat po sempri onori e glória:  
 Glória a s'altu eternu Rèi,  
 E a nosàerus vittoria  
 E celestialis coronas.

**Custu grandu Sacramentu**  
 venereus umiliaus,  
 e coment'e nui a su bentu  
 cedant is ritus passaus :  
 e su chi s'ogu non bidi  
 accetteus cum firma fidi.

A Deus Babbu onnipotenti  
 e a su Fillu Redentori,  
 cun su coru e cun sa menti  
 alabeus cun grandu onori;  
 e siat puru onori uguali  
 a s'Amori sustanziali.

Deus siat benedittu  
 Benedittu su santu Nòmini suu  
 Benedittu Gesu Cristu veru Deus e veru Ómini  
 Benedittu su Nòmini de Gesù  
 Benedittu su Sacratissimu Còru suu  
 Benedittu Gesù in su Santissimu Sacramentu de s'Altari  
 Benedittu su Spìritu Santu Amparadori  
 Beneditta sa grandu Mamma de Deus Maria Santissima  
 Beneditta sa santa e Immaculada Cuncetzioni sua  
 Benedittu su Nòmini de Maria Virgini e Mama  
 Benedittu Deus in is Angelus e in is Santus suus

Laudate Dominum omnes Gentes, laudate eum omnes populi  
 Quoniam confirmata est super nos misericórdia eius,  
 et veritas Dómini manet in aeternum.

Gloria Patri et Filio et Spiritui Sancto;  
 Sicut erat in principio et nunc et semper,  
 et in saecula saeculorum. Amen.

## Gòsos de Nostra Sennora de su Rosàriu

su trascriz. di Carlo Pisu

tradiz. di Zeddiani



Se - re - nis - si - ma a - u - ro - ra, de sos sant - tos me - lo - di - a

8



Pro - no - is pre - ga, Ma - ri - a, de su Ro - sa - riu Sen - no - ra.

15



A - u - ro - ra ru - ti - lan - te gem - ma fi - ne o - ri - en - ta - le cri - sta

23



Ma - ri - a, ma - re a - bun - dan - te de gra - zias in do - gni co - sa Ma -

30



li - nu - di - a - man - te, car - bun - cu ce - le - sti - a - le Ro - sa in

ri - a, so - le il - lu - stran - te, pul - chra lu - na lu - mi - no - sas Ma -

Torrada

## Gòsos de Nosta Sennora de su Rosàriu

Serenissima aurora  
 de sos Santos melodia,  
 pro nois prega Maria  
 de su Rosàriu Sennora.

1. Aurora rutilante  
 Gemma fine Orientale  
 Cristalinu Diamante  
 Carbuncu celestiale  
 Rosa intatta Virginale  
 De afflitos consoladora

2. Aurora gloriosa  
 De sos chelos ornamentu  
 In totu misteriosa  
 Maria vasu de arguentu  
 De tesoros fundamentu  
 De gràtzias causadora

3. Aurora produttiva  
 Perla de grande valore  
Aurora diffusiva  
 De ogni bene e licore  
Aurora chi in rigore  
 Ses de Deus imbasciadora

4. In te fonte cristalinu  
 Pienu de Virginidade  
 Su Eternu Verbu Divinu  
 Segundu in sa Trinitade  
 Assumpsit sa umanidade  
 Fatendeti Genitora

5. In te arcu triunfale  
 Circundadu de cleméntzia  
 Su Padre celestiale  
 ti pongisit sa poténtzia  
 Su fizu sa sapiéntzia  
 Su Spìritu sa gràtzia ancora

6. Sa Celeste Gerarchia  
 Grandes laudes intonesit  
 Cando Gabriele intresit  
 Repitinde Ave Maria  
 O lughe , consolù, e ghia  
 De s'ànima peccadora

7. Sa piús alta dignidade  
 Chi Deus mai apat dadu  
 In totu s'Eternidade  
 Apistis vasu doradu  
 Cando su Verbu Incarnadu  
 Ti petisit Genitora

8. Maria templu sagradu  
 Pienu de perfetzione  
Maria Tronu doradu  
 De su sàbiu Salomone  
Maria chi cun resone  
 Ses de gràtzias causadora

9. Maria palma de gloria  
 Rodeada de bellesa  
Maria ricca vittoria  
 In donni fidele impresa  
Maria ricca princesa  
 De dannos reparadora

10. Maria mare abundante  
 De gràtzias in dogni cosa  
Maria sole illustrante  
 pulchra luna luminosa  
Maria candida rosa  
 Tota celeste e decora

## cantu de su rosàriu

tradiz. Villanovafranca (trascr. Carlo Pisu)

### Gloria Patri (Coro Donne)



Glo - ri - a Pa - tri et Fi - li - o et Spi - ri - tu - i San - cto

### Sicut erat (Coro uomini)



Si - cut e - rat in prin - ci - pi - o et nunc et sem - per et in sae - cu - la sae - cu - lo - rum. A - men.

### Giaculatoria (Coro donne)



Allaba sempirisi a da sunomini de Gesusu e de Mari a su nomi ni de Gesusu e de Mari - a.

### Giaculatoria (Coro uomini)



Allaba us prus e pru - su su nomi ni de Mari a e de Gesu su nomi ni de Mari a e de Ge - sus.

### Babbu nostu (Coro uomini)



Bab - bu no - stu chi ses in is che - los san - ti - fi - cau su no - mi - ni tu - u ben - gia - da a no - su su



Re - gnu tu - u sia fat - ta sa vo - lun - ta - de tu - a com - men - te in su xe - lu e a i - ci in sa ter - ra.

## cantu de su rosàriu

tradiz. Villanovafranca (trascr. Carlo Pisu)

### Su pani nostu (Coro donne)



Su pa - ni no - stu de on - ni - a di do - nai sid - d'hoi e per - do - na - i si is pec -



ca - us no - stus com - men - te no - sa - tu - rus per - do - nausais de pi - do - ris no - stus



e no les - sas ar - ru i in ten - ta - zi - o - ni li - be - ra - nos de ma - le: A - min Ges.

### Ave Maria (Coro donne)



Deus ti sal - vet Ma - ri - a pre - na de gra - zias su Se - gno - re est cun te - gus be - ne - dit -



ta ses tu - i in tre tot - t'is sce - mias e be - ne - dit - t'è su frut - t'is in - tra - gnas u - as Ges.

### Santa Maria (Coro uomini)



San - ta Ma - ri - a mam - ma de De - us pre - gai po nos a - te - rus



pec - ca - do - ris im - moi e in s'o - ra de sa mor - ti no - stra e a - men Ges.



## GÒSOS PRO SOS MISTERIOS DE SA LUGHE

(Zuanni Antiogu Mura, Ilartzi, 2005 )

Sos omnes isbaidos  
ch' ant perdidu aerzu umanu,  
**s'agatent illichididos**  
**arrasande fitianu.**

<i>Strofa introduttiva:</i>	1. Pedimos chi etema rughe in sas oras de bisonzu, siat che sole in atonzu, ue est buju fatzat lughe, sos attrividos indrughe a su bene soberanu.	<i>Strofa conclusiva:</i>	17. o Paba, pedra segura, cun misteru lugheschidu sulleva donzi afrizidu, imbolopadu in tristura, males e benes mesura, franghindenos s'ampramanu.
2. Dae su paisu ighinu, cherinde s'anima nida, pro chi sa terrena vida esseret abba 'e trainu, at sighidu su caminu assortinde a su Giordanu.	3. In abba frisca e currente, su Battista at samunadu mantzas betzas de peccadu, da sos sinos de sa zente e Cristos Onnipotente battizat cun penzu arcanu.	4. Bessinde candidu lizu su chelu at tentu iscarriu, battizu netzessariu fit a s'innotzente fizu, chi esseret dadu assimbizu in su pelearu umanu.	
5. Maria mama donosa regollet netzessidade, a S'eterna Podestade dimandadu at lastimosa chi s'isposu cun s'isposa de s'istima fessint ranu.	6. Innanti de sa cumprida in sa terrena dimora, mancari fessit disora, ant pedidu azudu 'e vida cun grazzia meressida ant prenu brocca e tianu.	7. In sa festa 'e s'isposonzu prodizos at comintzadu, s'abba pro binu at mudadu, prapande raru bisonzu, umile, ancora meronzu, lughente che s'oghianu.	
8. Cando onestu precursore ant potentes castigadu, su chelu si est ispricadu a mischinu e peccadore abacande su dolore, cun su reposu galanu.	9. Su marture disizosu, ant caladu in crabetura, pro chi manna disaura esseret tranzidu in gosu, e mancaru memulosu momet andande lontanu.	10. Cun boghe pasida e crara, pregande in donzi logu, aperint origa e ogu, a cussa mutida rara, pintande chizos e cara fintzas omine metzanu.	
11. Apartados in su monte pregant cun devotzione, bisande chi onzi pessone aperzat anima e fronte e su terrenu orizonte bestat chintas de manzanu.	12. Pedru, «Faghimos sa tenda» nat a Cristos gloriosu, isettande veru gosu, menzus tzeleste sienda, proite onzatera arrenda est nicada che cabanu.	13. Da sa nue passizera paraula armoniosa, che pregadoria ermosa, narat cun bella manera: “custu est fizu de s'ispera, fertu mundu torret sanu”.	
14. Pro fagher sa pasca impare sos dissipulos preguntant, cando sunt tzertos s'appuntant detzidint ue chenare, poder menzus iscurtare su chistionu 'e fulanu.	15. Faeddande cun assentu, boghe crara che tenore, narat chi su traitore istat intro s'apomentu, chena perunu lamentu l'asant comente ghermanu.	16. Leados panes e binu, beneighet e los segat a nemos sa chena negat, pro no ponner isfainu in su disizu divinu, chi l'incravat pes e manu.	

## GÒSOS DE SOS MISTERIOS DE SA LUGHE

(Paola Ibba - Abbasanta)

Maria lughe divina  
naschida sena pecadu  
tue su mundu as salvadu  
dae sa sorte meschina.

1. Su Battista precursore  
battitzat in su Giordanu  
cuddu Deus Soberanu  
de su mundu Salvatore  
fruttu de s'Eternu Amore  
de sa Magistade Trina.
2. A s'isposonzu invitados  
suntis Maria e Gesù  
“Fizu inu no c'at piùs,  
azua sos malefadados”.  
Sos tzeracos ispantados  
'attint s'abba cristallina.
3. Et arribat su momentu  
de su Regnu a preigare  
sos omnes s'ant a salvare  
cun fide, cun pentimentu,  
s'in favore tirat su 'entu  
su bene faghet raighina.
4. Pigat Gesù a pregare  
a su monte in compagnia,  
cun Mosè et cun Elia  
si ponet a faeddare  
e lu ident ammentare  
de una lughe diamantina.
5. Cun tristura e pensamentu  
Gesù si depet lassare  
prima 'e nos abbandonare  
nos lassat eternu amentu,  
pro s'anima s'alimentu  
pro su coro meighina.

## GÒCCIUS PO IS MESTERIS DE SA LUXI

(Giovanni Manconi, Nurallao)

De s'anima eternu gòsu  
Ses po chi t'isgranat continu,  
Luxi de siguru camminu  
in manus 'e dognia speròsu!

1. Su primu Misteri est “biu”  
D'esemplada umilidadi  
De Gesù, Luxi 'e beridadi  
Chi si fait battiai in s'Arriu  
De Unu prus 'e Issu pittiu  
E bantàu dd'at Deus cumpraxiosu
2. Su segundu Misteri est aclaràu  
De miràculu in sa coja 'e Cana,  
Candu s'acua 'e frisca funtana  
Gesù in binu iat tramudau;  
de sa Mama sua Santa imploràu,  
ca vet'Issu est miraculosu
3. De s'Arrenniu 'e Deus Nunziata  
est su tertzu Misteri 'e Luxi;  
a su Vangelu e a sa Ruxi  
Deus de si converti si nada,  
ca sa gloria est allogada  
a s'ora eterna 'e riposu
4. Sa trasfigurazioni 'e Gesùu  
In su Monti cun Mosè e Elia;  
custa Luxi de Misteri ghia  
donat fortza a crei de prusu,  
ca sa “Boxi” manna de Susu  
est de Fideli Deus Paxiosu
5. Su cuintu Misteri est su Mannu  
innù Gesù donat totu de Issu :  
Sanguini e Corpus Suu, a remissu  
de peccaus, e traixinu su dannu ;  
chi mancu Giudas tentu at cundannu,  
ma perdònu misericordiosu

MISTERIOS LUMINOSOS  
(Giovanni Andrea Migheli, Santulussurgiu 2005)

Tue ch'in s'eternu gosu  
Che ses, o Maria Santa,  
**faghe c'apat lughe tanta**  
**su "Misteriu Luminosu"**

- |   |   |
|---|---|
| <p>1. Dae Zuanne po manu retzit su santu batizu Cristos de Deus Fizu Nat Matteu, in su Giordanu, ca si fuit fatt'umanu li pariat doverosu</p>                 | <p>6. Cando in d'una portantina un'infirmu l'an portadu, "Ti perdono ogni peccadu – l'at nadu – e como camina!" Sanat sa manu divina cust'infirmu bisonzusu</p> |
| <p>2. E apenas batizadu nd'essit de s'abba Gesusu in formè columba susu Deus l'enit e l'at nadu: fizu ti apo mandadu po dare lughè riposu</p>                 | <p>7. Cristos in pregadoria cun Pedru, Zuannè Zagu; arresonan de s'istragu cun Mosè e cun Elia: est prestu sa morte mia! neidi sentenziosu.</p>                 |
| <p>3. E de Cana in s'isposonzu cando su inu est mancadu Maria a Cristos l'at nadu: "che at de inu bisonzu" Issu de abba ogni conzu Faghet prenare piedosu</p> | <p>8. Ma cun custos de repente S'est Cristos trasfiguradu a cantu Luca at contadu Sa este l'enit lughente e nat Deus a sa zente : mèst fizu e virtuosu !</p>    |
| <p>4. Tando leat determinu Ch'at dare lughèst amante, su miraculu in s'istante faghet, e s'abba in binu mudat su fizu divinu ca est bonu e portentosu!</p>    | <p>9. E chenande in d'un'abitu narat s'eucaristia: "Su panèst sa carre mia e custu inu lichidu samben meu est beneittu, cibu de s'eternu gosu ! ».</p>          |
| <p>5. In d'una presone fea cand'a Zuanne ch'an postu Cristos tando a dogni costu Ch'èst andadu a Galilea E cun dolu e cun pelea preigat cussentziosu</p>      | <p>10. « De torrare a Babbu meu Su tempus nd'èst arrivadu », nat Cristos, e samunadu at sos pees, e sentz'anneu a totu su grup'intreu umil'e passentziosu.</p>  |

Maria ca ses sa mama  
de su chi est mortu in rughe  
po nois: da nos sa lughe  
cand'amus bisonzu e brama,  
tene attesa sa fiamma  
in custu mundu orrorosu.

SOS MISTEROS DE SA LUGHEDE SU ROSÀRIU  
(Salvator Angelo Chessa, Nuoro, Settembre 2005)

As incarnadu, Maria,  
Su Misteru de s'Amore :  
**In su Misteru nos ghia**  
**De sa vida de su Signore.**

<i>Primu Misteru de sa lughe. Cunteplamus:</i>	Gesus cando a su Giordanu Andat pro si batizare, A su Divinu Pianu, Chi su mundu dèt sarvare, Resolutu ponet manu, Send' isse su Sarvadore.	E apenas batizadu In su chelu apertu at vidu S'Ispridu 'e Deus faladu Che de columba vestidu. E su Babbu l'at giamadu: «Fizu meu 'e tant' amore».
<i>Secundu misteru de sa lughe. Cunteplamus:</i>	Gesus cando, cumbidadu In Cana a un'isposonzu, S'abba in vinu at cambiadu, Tue l'as vidu su bisonzu: Sa festa t'as abbizadu Chi fit perdende sapore.	L'avvertis preoccupada : «Fizu, su vinu est finidu!» «S'Ora non est arrivada!», Dur' isse t'at respondidu. «Faghide su chi bos nada», Nàs a donzi servidore.
<i>Tertzu misteru de sa lughe. Cunteplamus:</i>	Cando Gesus est essidu Annunziende a sa zente: «Como est su tempus cumpridu, Su Regnu 'e Deus cherente». E cussas terras ant vidu Lugh' in tantu iscuricore.	«Mudade mentalidade E credide a su Vanzelu! ». E mustrat sa veridade Chi est caminu a su Chelu. Intendet s'umanidade Sa nova bella 'e s'amore!
<i>Quartu misteru de sa lughe. Cunteplamus:</i>	Cand'a unu monte artzadu Chin Predu, Giovanne e Giagu S'est Gesus trasfiguradu, E discurrende unu pagu Chin Mosè e Elia est istadu In d'unu mare 'e lucore!	In tanta felitzidade Nât Predu: «Istamus inoghe!» Finit cussa claridade, E s'intendet una voghe: «A Fizzu meu ascurtade, Custu Fizu 'e tant' amore!»
<i>Quintu misteru de sa lughe. Cunteplamus:</i>	Cando in sa Pascale Chena Chin sos suos cunregadu Pro esser s'offerta prena Gesus mandigu s'est dadu, De vida bundante bena, A s'omine peccadore.	«Est su Corpus meu donadu Pane vivu, mandigade, Est su Samben derramadu Binu 'e nova umanidade». Vintu s'antigu peccadu, Su tempus est de s'Amore.